

# Fotos dal 1890 fin oz

Fototeca Dicziunari Rumantsch Grischun

DA GION NUTEGN STGIER/ANR

■ Dapi il 1997 han ins digitalisà la fototeca dal Dicziunari Rumantsch Grischun e mess las fotos sin ina data da bancas. Fin ussa aveva nagin access direct sin quellas millis e millis fotografias. Quai è ussa istorgia cun esser las fotografias en lingia directa. L'interess per la fototeca dal Dicziunari Rumantsch Grischun è s'augmentà fitg ils davos onns ed adina daplis personas han visità l'instituziun per tschertgar en ses archiv fotografias. Sco che *Ursin Lutz*, redactur tar il Dicziunari Rumantsch Grischun ha ditg han numerus interessads adina ditg che fiss pli simpel dad avair access tar las numerusas fotografias davent da chasa. «Ussa avain nus ademplì quel giavisch cun metter las 30 000 fotografias online ed er gist actualisar la banca da datas», manegia Ursin Lutz tut cuntent. Electronic è ussa pussaivel dad avair in-



En la fototeca dal Dicziunari Rumantsch Grischun sa chattan er numerusas fotografias da passa 100 onns.

FOTO R. ZINGGELER

vista da las fotografias e da retrer quellas per disc compact per UBS-stick ubain sin palpieri. Telechargiar las fotografias direct sin l'agen computer è il mument betg anc pussaivel.

## Blers avantatgs

Ursin Lutz ha ditg che las pli veglias fotografias dateschan dal 1890 e las pli novas èn fotografias actualas. Da tschertgar las fotografias è pli u main fitg simpel sur l'adressa dad internet: [www.drg.ch](http://www.drg.ch). Tschertgar las fotografias è pussaivel tenor lieu, tema e fotograf etc. L'avantatg è che nagin dals visitaders da quella purschida electronica ha da conuscher la structura da la banca da datas. Las fotografias èn perditgas dal temp e documenteschan eveniments, glied ed animals e cas istorics. Ellas èn dentant er ina collecziun da nossa natira fitg vasta e sveglian segir tar blers er emoziuns.